

Visoki predstavnik potvrdio svoju podršku angažmanu međunarodne zajednice u reformi obrazovanja

Visoki predstavnik, Wolfgang Petritsch, izrazio je svoju punu podršku poruci koju je u četvrtak uputio prvi zamjenik visokog predstavnika, Donald Hays, na okruglom stolu o reformi obrazovanja. Visoki predstavnik je ponovo potvrdio opredijeljenost OHR-a i međunarodne zajednice za provedbu temeljite i brze reforme obrazovnog sistema u Bosni i Hercegovini, kako bi se omogućilo nastavnicima da efikasno izvode nastavu i da djeca uče u kreativnom i sigurnom okruženju. Visoki predstavnik poziva lokalne organe vlasti, nastavnike, roditelje i učenike da ulože sve napore kako bi se istinski poboljšao standard obrazovanja u Bosni i Hercegovini – a to se može postići samo ako se obrazovanje bude smatralo strateškim prioritetom.

Ambasador Hays je u ime visokog predstavnika učestvovao u razgovoru na okruglom stolu sa direktorima škola, roditeljima i učenicima iz škole Jovan Dučić iz Kasindola, kao i iz dvije bratske škole, Šeste osnovne škole sa Stupa i škole Vrhbosna Faletići iz sarajevske općine Stari Grad. Ove škole su među vodećim primjerima škola u Bosni i Hercegovini u kojima se nastava obavlja prema modernim metodama.

Ocjenjujući napredak koji je ostvaren u protekle dvije godine, ambasador Hays je konstatirao da su učinjeni intenzivni naponi kako bi se eliminirali šovinistički i netolerantni sadržaji iz udžbenika i kako bi se stvorilo obrazovno okruženje u kojem se svako dijete iz bilo koje sredine osjeća dobrodošlo i sigurno u bilo kojoj školi u BiH. Ti naponi će se nastaviti. Škole u Bosni i Hercegovini sada moraju početi raditi na eliminiranju

zastarjelih nastavnih metoda, zasnovanih na učenju napamet, te zamjeniti te metode naprednim i efikasnim tehnikama koje su postale norma u drugim krajevima Evrope.

Ambasador Hays je konstatirao da je visoki predstavnik tokom skoro trogodišnjeg mandata u Bosni i Hercegovini stalno naglašavao primarnu važnost obrazovanja za oporavak zemlje. "Dobro organiziran školski i univerzitetski sistem, koji koristi moderne nastavne metode u cilju obrazovanja novih generacija, nije luksuz već potreba, pošto se BiH takmiči sa svojim susjedima da privuče strana ulaganja i stvori funkcionalnu tržišnu privredu", naveo je ambasador Hays. "To je također neophodno ukoliko Bosna i Hercegovina želi da se pripremi za dalju integraciju sa ostalim zemljama Evrope".

Uprkos činjenici da "svako priznaje da je obrazovanje ključ za socijalnu i političku harmoniju i ekonomski razvoj", dodao je ambasador Hays, "neki političari su još uvijek odlučni da stvaraju barijere među školskom djecom, umjesto da grade mostove".

Međunarodna zajednica je koordinirala svoj pristup obrazovanju i dala mu prioritet, i sarađivaće zajedno sa domaćim akterima iz oblasti obrazovanja kako bi se premostile političke prepreke, naveo je ambasador Hays.

Ambasador Hays je konstatirao da će kampanja, koju trenutno priprema OHR i koja će biti provedena širom zemlje, imati za cilj da "otkrije i obznani mnoge načine kojima neki napredni nastavnici u cijeloj zemlji već poboljšavaju standarde i time djeci pružaju šansu za bolji život". Rekao je da nastavnici i roditelji moraju poduzeti inicijativu tamo gdje političari nemaju uspjeha. "Škole su već sposobne da mnogo toga postignu, uprkos preprekama koje pred njih postavljaju političari koji se i dalje drže svojih zastarjelih programa", rekao je ambasador Hays.

Ambasador Hays je imao priliku da cuje misljenja roditelja,

nastavnika i učenika.

Jedan roditelj je rekao da je sretan što njegova djeca pohađaju nastavu u multietničkoj školi, ali je izrazio zabrinutost za povratnike u oba entiteta. On je rekao da bi situacija bila jednostavnija da se isti udzbenici koriste sirom BiH. Jos je dodao da bi nekim školama trebalo vratiti stare nazive da se niti jedan učenik ne osjeća zapostavljeno.

Nastavnici su primarno bili zabrinuti zbog zastarjelog školskog plana i programa.

“Međunarodna zajednica ima partnere u reformi obrazovanja u Bosni i Hercegovini. I danas za ovim okruglim stolom mogu prepoznati partnere. Vi ste predstavnici desetina hiljada roditelja, nastavnika i učenika iz cijele zemlje koji žele modernu i efikasnu nastavu u školama sa dobrim rukovodstvom i bez predrasuda. Mi smo spremni i voljni sarađivati sa vama”, rekao je ambasador Hays.